

Na osnovu člana 27. Zakona o ustanovama ("Službeni list R BiH", broj: 6/92, 8/93 i 13/94), člana 87. stav 5. Zakona o visokom obrazovanju ("Službene novine Kantona Sarajevo", broj: 17/99, 14/00, 15/01, 13/02, 12/03, 15/03, 13/04, 31/04 i 22/05) i člana 53 e. stav 4. Zakona o izmjenama i dopunama Zakona o visokom obrazovanju Kantona Sarajevo ("Službene novine Kantona Sarajevo" br: 23/06)), a u skladu sa odredbama člana 162. Pravila Univerziteta u Sarajevu, Upravni odbor Univerziteta u Sarajevu, na prijedlog Senata Univerziteta u Sarajevu, je na 10. sjednici održanoj 25.09.2006. godine, d o n i o

PRAVILNIK
O POLAGANJU ISPITA
na visokoškolskim ustanovama
Univerziteta u Sarajevu
za studente koji studiraju u skladu sa Bolonjskim procesom

Član 1.

Ovim pravilnikom bliže se uređuje postupak ispitivanja i ocjenjivanja, rokovi i termini polaganja ispita za prvi ciklus studija koji vodi do zvanja završenog dodiplomskog studija (the degree of Bachelor) ili ekvivalenta (u daljem tekstu: dodiplomski studij) na Univerzitetu u Sarajevu (u daljem tekstu: Univerzitet). Dodiplomski studij za sticanje diplome traje tri odnosno četiri godine, a vrednuje se sa 180 odnosno 240 (E)CTS studijskih bodova ((E)CTS studijski bodovi odgovaraju kriterijima Evropskog sistema prijenosa kredita – European Credit Transfer System – ECTS).

Član 2.

Uspjeh studenata na ispitu i drugim provjerama znanja, vrednuje se i ocjenjuje sistemom uporedivim sa (E)CTS sistemom kako slijedi :

10 (A) – (izuzetan uspjeh sa neznatnim greškama), nosi 95-100 bodova,
9 (B) – (iznad prosjeka, sa ponekom greškom), nosi 85-94 bodova,
8 (C) – (prosječan, sa primjetnim greškama), nosi 75-84 bodova,
7 (D) – (općenito dobar, ali sa značajnijim nedostacima), nosi 65-74 bodova,
6 (E) – (zadovoljava minimalne kriterije), nosi 60-64 bodova,
5 (F, FX) – (ne zadovoljava minimalne kriterije i potrebno je znatno više rada), ispod 60 bodova.

U slučaju da nijedan student ne postigne 95 bodova, što predstavlja minimum za ocjenu 10, skala iz prethodnog stava može se korigirati prema najboljem postignutom uspjehu na prvom ispitnom roku.

Član 3.

Rad studenata se prati i ocjenjuje kontinuirano u toku jednog semestra.

Ocjenjivanje se vrši dodjeljivanjem bodova za svaki oblik aktivnosti i provjere znanja u toku semestra i na završnom ispitu, na kojem se utvrđuje konačna ocjena.

U strukturi ukupnog broja bodova najmanje 50% bodova mora biti predviđeno za aktivnosti i provjere znanja u toku semestra.

Završni ispit se u strukturi ocjenjivanja može vrednovati sa najviše 50% bodova.

Visokoškolska ustanova je obavezna u svakom semestru organizirati za vanredene studente i studente studija učenjem na daljinu nastavu „u učionici“ po pravilu prve, osme i petnaeste nedjelje svakog semestra, a što se detaljnije regulira pravilima studija svake visokoškolske ustanove.

Vanredeni studenti i studenti studija učenjem na daljinu obavezni su prisustvovati oblicima provjere znanja kako je predviđeno silabusima predmeta na svakoj visokoškolskoj ustanovi, koje se, po pravilu obavljaju u toku onih radnih nedjelja u kojima se organizira nastava za ove studente, a što se detaljnije regulira pravilima studija svake visokoškolske ustanove.

Član 4.

Oblici provjere znanja mogu biti pismeni, usmeni i praktični. Provjera znanja je po pravilu pismena.

Ispit može biti pismeni, usmeni i praktični.

Pismena provjera se po pravilu vrši putem testa ili pismenog rada.

Način ispitivanja određuje matična katedra ili nastavnik.

Ispit i svi oblici provjere znanja su javni.

Ispiti iz umjetničkih predmeta polažu se po pravilu komisijski.

Rezultati pismenih ispita se čuvaju do 1. novembra sljedeće školske godine.

Član 5.

Studij I stepena se završava polaganjem svih ispita i/ili izradom završnog rada u skladu sa studijskim programom.

Član 6.

Završni ispit se obavlja u toku posljednje sedmice nastave ili u prvoj sedmici nakon završene nastave. Studenti koji ne polože ispit (ne zadovolje) u regularnom (redovnom) roku mogu polagati popravni ispit iz predmeta koji nisu položili na kraju jednog semestra. Između regularnog (prvog) i popravnog ispitnog roka nastavnici i saradnici će konsultacijama, a po potrebi i dopunskom nastavom pomoći studentima da se pripreme za popravni ispit.

Član 7.

Studenti koji u prvoj godini ostvare najmanje 54 (E)CTS studijskih bodova mogu upisati drugu godinu studija.

Treću, odnosno četvrtu godinu studija mogu upisati samo studenti koji su položili sve ispite iz prethodne dvije odnosno tri godine studija, odnosno samo studenti koji su ostvarili najmanje 120, odnosno 180 (E)CTS studijskih bodova.

Petu godinu studija mogu upisati samo studenti koji su položili sve ispite iz prethodnih godina studija, odnosno samo studenti koji su ostvarili najmanje 240 (E)CTS studijskih bodova.

Prilikom svakog ponovnog upisa predmeta (kojeg student ponavlja) student je dužan uplatiti odgovarajuću naknadu čiju visinu, svojom odlukom, utvrđuje Senat Univerziteta.

Član 8.

Student koji nije zadovoljan postignutom ocjenom može u roku od 24 sata nakon saopćenja ocjene pismeno tražiti da se ispit ponovi pred komisijom. Zahtjev za ponavljanje ispita mora biti obrazložen.

Dekan imenuje predsjednika i dva člana komisije u roku od 24 sata od primitka zahtjeva, ako ocijeni da je zahtjev opravdan, s tim da jedan član komisije mora biti iz drugog nastavnog predmeta, a ispitivač s čijom ocjenom student nije bio zadovoljan ne može biti predsjednik komisije.

Dekan određuje vrijeme polaganja ispita u roku od tri dana nakon podnošenja zahtjeva studenta.

Pismeni ispit ili pismeni dio ispita neće se ponoviti pred komisijom, već će ga komisija ponovno ocijeniti. Komisija će ocijeniti i sve radove koje je student radio u toku nastave i vježbi.

Komisija može donijeti ocjenu na bazi samo pismenog ispita i rada u toku nastave i vježbi ili obaviti i usmeni dio ispita.

Komisija donosi odluku većinom glasova.

Na odluku komisije može se izjaviti žalba rektoru Univerziteta.

Student može tražiti komisijski ispit iz najviše dva predmeta na kraju jednog semestra.

Član 9.

Rokovi i termini polaganja ispita za dodiplomski studij na Univerzitetu u Sarajevu, u toku školske godine, su:

<i>Rok za polaganje ispita u toku školske godine</i>	<i>Termin za polaganje ispita u toku školske godine</i>
U zimskom semestru:	
Ispitivanje i ocjenjivanje se vrši dodjeljivanjem bodova za svaki oblik aktivnosti i provjere znanja u toku trajanja čitavog zimskog semestra	od 1-15. nedjelje
Završni ispit	16. nedjelja
Dopunska nastava i popravni ispiti	od 17-20. nedjelje

U ljetnom semestru:	
Ispitivanje i ocjenjivanje se vrši dodjeljivanjem bodova za svaki oblik aktivnosti i provjere znanja u toku trajanja čitavog ljetnog semestra	od 1-15. nedjelje
Završni ispit	16. nedjelja
Dopunska nastava i popravni ispiti	od 17-20. nedjelje
Mogućnost organizovanja dopunske-dodatne (kondenzovane) nastave (ljetna škola, ljetni univerzitet i sl.) uključujući i oblike provjere znanja	od 21-28. nedjelje

Član 10.

Ovaj pravilnik se primjenjuje za studente koji studiraju u skladu sa Bolonjskim procesom, a počev od generacije studenata upisanih u prvu godinu studija na visokoškolske ustanove Univerziteta u Sarajevu u školskoj 2005/2006. godini.

Član 11.

Ovaj pravilnik stupa na snagu danom donošenja.

**PREDSJEDNIK
UPRAVNOG ODBORA**

Prof. dr. Sead Redžepagić



Broj: 02-I-1258/06
Sarajevo, 25.09.2006. godine

- UPRAVNI ODBOR -

Broj: 02-I-334/07

Sarajevo, 27.02.2007. godine

Na osnovu člana 27. Zakona o ustanovama („Službeni list RBiH“, broj: 6/92, 8/93 i 13/94), člana 87. stav 5 Zakona o visokom obrazovanju („Službene novine Kantona Sarajevo“, broj: 17/99, 14/00, 15/01, 13/02, 12/03, 15/03, 13/04, 31/04 i 22/05), člana 53 e. stav 4 i člana 53 l. stav 1 Zakona o izmjenama i dopunama Zakona o visokom obrazovanju Kantona Sarajevo („Službene novine Kantona Sarajevo“, broj: 23/06) i člana 162. Pravila Univerziteta u Sarajevu, a u skladu sa aktom Ministarstva obrazovanja i nauke Kantona Sarajevo broj: 11-01-38-6690-1, Upravni odbor Univerziteta u Sarajevu je, na 14. sjednici održanoj 27.02.2007. godine, d o n i o

PRAVILNIK
O IZMJENAMA PRAVILNIKA
O POLAGANJU ISPITA
na visokoškolskim ustanovama
Univerziteta u Sarajevu
za studente koji studiraju u skladu sa Bolonjskim procesom

Član 1.

Član 10. mijenja se i glasi:

„Ovaj pravilnik se primjenjuje za studente koji studiraju u skladu sa Bolonjskim procesom, a počev od generacije studenata upisanih na visokoškolske ustanove Univerziteta u Sarajevu u školskoj 2006/2007. godini“.

Član 2.

Pravilnik stupa na snagu danom donošenja.

O b r a z l o ž e n j e

Aktom Ministarstva obrazovanja i nauke Kantona Sarajevo broj: 11-01-38-6690-1 od 09.01.2007. godine, ukazano je na nezakonitost odredbe člana 10. *Pravilnika o polaganju ispita na visokoškolskim ustanovama Univerziteta u Sarajevu za studente koji studiraju u skladu sa Bolonjskim procesom*, a koji je donio Upravni odbor Univerziteta u Sarajevu 06.09.2006. godine.

Shodno obrazloženju iznesenom u naprijed navedenom aktu Ministarstva obrazovanja i nauke Kantona Sarajevo, donesene su izmjene *Pravilnika o polaganju ispita na visokoškolskim ustanovama Univerziteta u Sarajevu za studente koji studiraju u skladu sa Bolonjskim procesom*, kao u dispozitivu.

***PREDSJEDNIK
UPRAVNOG ODBORA***

Prof. dr. Sead Redžepagić , s. r.